

LÈT PASTORAL KONFERANS EVÈK AYITI YO

***NAN OKAZYON ANE KI APA A POU KÈ SANSIB BONDYE A
AK FÈT NWÈL 2015 LAN***

Pou Pè yo, Relijye ak Relijyez yo,
Pou Fidèl nan dyosèz yo, pawas yo, chapèl ak kominote yo,
Pou Fanm ak gason ki genyen bon volonte,

1- «Favè ak kè poze pou nou nan Bondye Papa nou an » (Efezyen 1:2), Li menm ki rich ak kè sansib, poutèt kalite renmen li renmen nou. » (Efezyen 2 : 4) ! Li envite nou pou nou gen kè sansib youn pou lòt , menm jan li menm li gen kè sansib pou tout pitit li yo (Lik 6 : 36).

2- Avèk lèt sa a, nou menm Evèk yo nan Legliz Katolik an Ayiti, n ap bay kèk oryantasyon espiyèl ak pastoral pou ede Pèp Bondye a viv Jibile espesyal sa a sou kè sansib la, jan Pap Franswa mande sa. Jibile a ap kòmanse jou k ap 8 desanm 2015 lan, nan fèt Manman Mari Imakile, l ap fini jou k ap 20 novanm 2016 la nan fèt Kris Wa, Kris la ki Wa sou tout tè a.

Sa Jibile a ye ?

Nan istwa Legliz Katolik, Jibile a se yon gwo evènman relijye. Se yon ane pou nou jwenn padon pou peche nou yo epi pou Bondye fè pa nou pou sa nou ta dwe peye pou peche nou yo. Se yon ane pou moun ki te ènmi vin zanmi, pou moun chanje kè yo epi pou akeyi padon Bondye a nan sakreman rekonsilyasyon an. Konsa, ap vin genyen solidarite, esperans, jistis ak angajman nan sevis Bondye a ansanm avèk frè nou yo nan kè kontan ak nan kè poze. Ane Jibile a se sitou ane Kris la, li menm ki pote lavi ak favè Bondye pou tout moun.

REDEKOUVRI VRÈ VIZAJ BONDYE A, KI SE YON « BONDYE KÈ SANSIB »

1-Ane sa a, ki se yon ane ki apa pou Kè Sansib Bondye a, dwe pou nou yon okazyon pou dekouvri yon lòt fwa epi ede lòt moun dekouvri vrè vizaj Bondye a tankou yon Papa, yon « Bondye ki rich ak kè sansib » (Efezyen 2 : 4).

2- Se vrè vizaj sa a Bondye genyen an nou dekouvri epi nou selebre nan okazyon fèt Nwèl la, nan ti bebe ki fèt Bètleyèm nan, ki se revelasyon ak manifestasyon kè sansib Bondye a. Se poutèt sa, Sen Toma AKen di sa byen : « Kè sansib la se zafè Bondye menm li ye. Konsa, tout pouvwa Bondye genyen, se pouvwa pou l aji ak kè sansib nan fè li fè pa nou » (*Summa Theologiae, II-II, q. 30, a. 4.*).

3- Nou envite nou pou nou pran tan pou nou adore vizaj Kè Sansib Bondye Papa a, pou l klere nou sou wout kè sansib la, pou l vlope nou chak jou nan lavi nou, epi pou n ka sanble avèk li : « Lè nou vire je nou gade l, sa fè kè nou kontan, nou pap janm wont » (Sòm 34 : 5).

4- Se konsa tou, pandan Jibile espesyal Kè Sansib sa a, nou ta renmen pou tout sa nap fè nan Legliz la tankou : misyon, pastoral, katechèz, litiji, predikasyon, priyè, akonpayman espartyèl, retrèt pè yo, jounen rekoleksyon yo, edikasyon... se pou tout bagay sa yo ede nou chèche, prezante, revele, (re)dekouvri ak anonse « Bondye Kè Sansib sa a », ki se Bondye tout bon vre a. Pi gwo sousi nou genyen, se konnen Bondye sa a ki gen Kè l Sansib « pou toutan » (*Sòm 135*) epi fè lòt moun konnen l. Nou vle chèche l pou nou rankontre l ankò epi ede lòt yo rankontre li. Nou vle renmen l epi ede lòt moun renmen l avèk yon kè ki cho. Se Kè Sansib sa a Bondye genyen an Mari te chante ak selebre (Lik 1 :50). Kè Sansib sa a depase peche a. Li pi fò pase mal la. L ap toujou pote lavikwa sou mal la : « Pran kouraj, mwen genyen batay la kont tè a » (Jan 16 : 33)...

GEN KÈ SANSIB AK TOUT MOUN POU LESPERANS BOUJONNEN ANKO

1-Nou menm Evèk Legliz Katolik an Ayiti, nou se Gadyen yon pèp ki rankontre ak anpil soufrans, ak tout kalite mizè : mizè materyèl, sikolojik, moral ak espiryèl. Nou swete pou nou fè tout sa ki posib pou tout moun, ni sa ki kwè, ni sa ki pa kwè, yo rive fè yon rankont pèsonèl ak Kè Sansib Bondye a nan selebrasyon ane kè sansib la nan Peyi nou an, an Ayiti. Nou ta vle Jibile espesyal kè sansib sa a tounen pou tout moun yon okazyon pou yo fè bon jan eksperyans jan Bondye pre nou, li menm ki se yon « Papa Kè Sansib ». Bondye sa a fè nou santi jan kè li fèb pou nou ; konsa, li fè lesperans tounen boujonnen epi li pote fòs kouraj pou tout moun ki ta anvi pèdi espwa, ki dekouraje, espesyalman sa ki pi pòv yo, sa lavi a ap maltrete, sa sosyete a meprize

2- Se konsa, kote Legliz la ye, Kè Sansib Bondye Papa a dwe parèt aklè tou. Se sa ki fè moun ka kwè nan Legliz la. Menm jan Pap Franswa mande l la, nou vle ak tout kè nou pou kote Legliz nou an ye, tankou nan pawas nou yo, espesyalman nan kominote yo, pou tout kote sa yo tounen yon ti paradi kè sansib anndan you reyalite zafè kabrit pa zafè mouton » (*Pap Franswa*).

3- Nou mande pandan ane ki apa a pou Kè Sansib Bondye a, pou nou pa janm bouke gen kè sansib, sitou nan akonpayman espiryèl, nan sakreman padon ak nan rekonsilyasyon. Nou mande pou nou tounen bay eksperyans sakreman padon an ak rekonsolyasyon an (sakreman konfesyon an) valè l te geyen. Se pou nou mete eksperyans sa a nan kè lavi Legliz la. Eksperyans sa a pran rasin li nan yon rankont ak Bondye ki boulye lavi nou, yon Bondye ki pa janm bouke resevwa nou, ki pa janm bouke fè pa nou, ki pa janm bouke montre n kè sansib li, ki pa janm bouke jete peche nou yo nan fon lanmè (*Miche 7 : 18-19*). Bondye sa a toujou ofri nou padon li tankou yon sous ki pap janm sèk epi ki toujou rete jan l ye.

***AKEYI KÈ SANSIB LA TANKOU YON BON FONDASYON NOU
DWE KONSTWI TOUT BAGAY SOU LI***

1-Pandan tan nwèl la ak Jibile espesyal Kè Sansib la, se san pran souf n ap envite n pou nou pa rete fèmen sou nou menm ni rete endiferan, men pou n kite Kè Sansib Bondye a touche kè nou. Nan peyi nou an, jounen jodi a, nou bezwen anpil kè sansib : kè sansib pou lavi depi li kòmanse nan vant Manman an jis nan denye bout tan li sou tè a ; kè sansib pou fanmi, kè sansib pou timoun yo ; n ap sonje yon fason espesyal tout timoun y ap maltrete yo, timoun restavèk yo ak timoun nan lari yo ; kè sansib pou moun andikape yo ; kè sansib pou grandèt yo ; kè sansib pou moun ki pi pòv yo, sa ki nan plis difikilte yo, sa ki pi fèb yo, sa ki pi frajil yo ; kè sansib pou kreyasyon an, anviwonman an k ap degrade chak jou, eks.

2- Nou kwè li enpòtan pou chak ayisyen, fanm kou gason, viv nan kè sansib pandan l ap konsidere kè sansib la tankou yon byen ki gen anpil valè. Li enpòtan pou li fè l antre toupatou anndan sosyete nou an. Nou kwè li enpòtan tou pou kè sansib la tounen lakay nou, an Ayiti, regleman ki dwe dirije kè chak ayisyen, fanm kou gason. Se pou kè Sansib la enspire, motive, reglemante, kondisyone lafwa, larelijyon, relasyon nou youn avèk lòt, byen viv ansanm nan. Se li ki dwe gide relasyon nou avèk lavi, fanmi, edikasyon, kreyasyon an, anviwonman an, byen ki la pou sèvi tout moun, politik la, pouvwa a, jistis la, kilti a, eks.

3- Pou reveye konsyans nou k ap dòmi devan eskandal povrete, lamizè, lasoufrans, devan anpil frè ak sè nou yo ki blese paske yo pa respekte diyite yo, nou ankouraje nou ak tout fòs nou pandan fèt Nwèl la ak Ane Kè Sansib la, pou nou chèche fè **zèv kè sansib** pou sa ki gen pou l wè ak lavi kò nou ni ak lavi lespri nou.

- **Zèv kè sansib pou lavi kò a se** : bay moun ki grangou manje, bay moun ki swaf bwè, mete rad sou moun ki toutouni, akeyi etranje yo, pran swen moun ki malad yo, vizite prizonye yo, antere moun ki mouri yo.

- **Zèv kè sansib pou lavi lespri a se** : bay moun ki nan dout yo bon konsèy, bay moun lansèyman sou sa yo pa konnen, bay moun ki nan peche yo konsèy ki pou ede yo chanje, pote konsolasyon pou moun ki nan lapenn, padone moun ki fè nou tò, sipòte avèk pasyans moun yo ki ensipòtab, lapriyè Bondye pou ni moun ki vivan ni moun ki mouri yo.

***PASE NAN « POT SENT LAN »
AVÈK VOLONTE POU NOU FÈ PENITANS EPI POU NOU
CHANJE KÈ NOU TOUT BON VRE***

1- Pandan Jibile espesyal kè sansib la, nou ankouraje tout fidèl yo ak tout fòs nou pou yo chèche Bondye ak padon li an nan fè penitans ak pelerinaj. Sa dwe sevi yon siy ki va montre nou vle tout bon vre chanje kè nou. Nou ankouraje nou pou nou vin nan pèlerinaj nan «Pòt Sent lan», «Pòt Kè Sansib la». Se yon pòt yo va louvri nan chak katedral / ko-katedral oubyen nan legliz yo Evèk dyosèz la va chwazi pou sa. Pelerinaj penitans espiyèl sa a ap fè nou viv epi jwenn “gwo favè jibile a”, sa nou rele “endiljans jibile a”. L ap tankou yon bon jan eksperyans kè sansib Bondye a. Gwo favè jibile a, sa nou rele “endiljans jibile a” se: efase Bondye efase, ni pou lavi sou tè a, ni pou lavi apre lanmò, soufrans nou ta dwe sibi poutèt peche nou yo.

2- Nou swete pou pèlerinaj sa a k ap mennen n nan «Pòt Sent lan», « Pòt Kè Sansib la » chofe kè nou pou n aksepte chanje. Ak konkou lagras ane jibile a, se pou pelerinaj sa a ede nou debarase nou jou apre jou ak tout sa ki mal, ak mechanste, tout move santiman, kenbe moun sou kè, kòlè, vyolans, vanjans, endiferans, egoyis. Tout bagay sa yo mete nou

nan chenn epi yo anpeche nou padone, rekonsilye youn ak lòt , vle byen youn pou lòt epi viv nan libète ak nan kè kontan. Pandan n ap pase nan «Pòt Sent lan», nou swete pou nou chak fè eksperyans Renmen Kè Sansib Bondye a ki konsole, padone epi ki bay esperans. Nou swete pou nou chak kite Kè Sansib Bondye a anbrase nou, epi flanbe kè nou. Konsa, nou kapab angaje nou pou n vin gen kè sansib pou lòt yo menm jan Papa a genyen l pou nou...

MEN SA NAP MANDE NOU POU FINI

1- Nou menm Evèk Legliz Katolik an Ayiti, nou konnen ki gwo reskonsablite nou genyen kòm Pastè pèp sa a ki pase anba anpil eprèv, men ki gen anpil kouraj epi ki vanyan. Nou pa ka kache gwo kè sote nou genyen lè nou wè kijan peyi a ap depafini chak jou pi plis. Se yon degradasyon moral, sosyal, ekonomik, politik, anviwonmantal ak ekolojik. Nou pèdi anpil nan sa ki gen valè pou nou. Sa rive nou akòz divizyon nou yo, youn ap batay ak lòt, byen ki la pou sèvi tout moun vin pa gen okenn sans pou nou, anyen pa di nou anyen, nou manke oswa nou pa gen sans responsablite.

2- Nan tan fèt nwèl la epi nan Ane Kè Sansib sa a, se ak tout fòs nou, nou mande tout ayisyen pou kite nèt sa ki mennen nan rayisans, divizyon, chirepit, egoyis, chak koukouy klere pou je l, kwè anyen pa ka chanje, anyen pa di w anyen, pa pran responsablite nou, kraze brize. Nou mande nou pou nou angaje nou nan chimen kè sansib la, nan padon ki se yon fòs k ap fè nou leve kanpe pou yon lavi tou nèf epi k ap ban nou kouraj pou n gade lavni nou avèk esperans: «benediksyon pou moun ki gen kè sansib, paske yo va jwenn kè sansib» (Mat. 5:7).


3- Pou n fini, pandan n ap prepare Jibile espesyal kè sansib la, nou mande chak ayisyen, fanm kou gason, chak fidèl, chak dyosèz, chak pawas, chak fanmi, chak kominote, chak asosyasyon, chak mouvman nan Legliz oubyen nan sosyete sivil la, pou nou aji avèk kè sansib tout

bon vre. Sa va fè nou bay yon patisipasyon enpòtan nan leve tèt peyi sa a nou renmen an. Reveye nou epi viv depi kounye a dapre tan Kè Sansib la, tan chanjman an! “Koulye a, men bon moman an rive, men jou delivrans lan parèt...”(2 Kor. 6 : 2).


4- Nou lage nou nan men Manman lavyèj Mari, Manman kè sansib la, k ap lapriyè avèk anpil renmen nan kè l pou nou. Nou lage nan men l tan nwèl sa a ansanm ak Jibile espesyal Kè Sansib la, pou l pwoteje yo kòm manman. Konsa, tan sa yo va tounen pou nou an Ayiti yon tan ki pote favè, yon moman espesyal ki pote lagras ak anpil chanjman materyèl, moral ak espartyèl.

5- Nou swete pou nou tout viv tan nwèl sa a avèk kè kontan, epi pou nou akeyi Kè Sansib Bondye a nan kè poze, nan trankilite ak konfyans pandan tout lane 2016 la!


Lèt pastoral sa a fèt Lilavwa, kote Konferans Evèk Ayiti yo konn reyini an, jou ki 27 Novanm 2015, nan okazyon fèt Notredam Meday ki pote Mirak la.




+ S. Em. Cardinal Chibly LANGLOIS
Évêque du Diocèse des Cayes
Président de la CEH



+ S. E. Mgr. Yves Marie PEAN, CSC
Évêque du Diocèse des Gonaïves



+ S. E. Mgr. Max Leroy MESIDOR
Archevêque Métropolitain du Cap Haïtien
Vice-Président de la CEH




+ S. E. Mgr Pierre André DUMAS
Évêque du Diocèse d'Anse à Veau/ Miragoâne



+ S. E. Mgr. Joseph Gontrand DECOSTE, SJ
Evêque du Diocèse de Jérémie
Secrétaire Général de la CEH




+ S. E. Mgr. Launay SATURNE
Évêque du Diocèse de Jacmel




+ S. E. Marie Erick G. TOUSSAINT
Evêque Auxiliaire de Port-au-Prince
Econome de la CEH



+ S. E. Mgr Quesnel ALPHONSE, SMM.
Evêque du Diocèse de Fort Liberté



+ S. E. Mgr Guire POULARD
Archevêque Métropolitain de Port-au-Prince



Mgr. Faublas LOUIS
Administrateur Diocésain
du Diocèse de Hinche



+ S. E. Pierre Antoine PAULO, OMI
Évêque du Diocèse de Port de Paix